

Ni Pangulong
Thomas S. Monson



Parte sa Espirituhanon nga Kahanda

Laygay gikan sa Aton Propeta

Isa ka Pundasyon sang Pagtuo

“Kon wala kita sang madalum nga pundasyon sang pagtuo kag mabakod nga panakshion sang kamatuoran, ayhan mabudlayan kita sa pag-agwanta sang grabe nga mga bagyo kag makakulurog nga mga hangin sang pagtilaw nga sa indi malikawan nagaabot sa tagsa sa aton.

“Ini nga kabuhi isa ka tion sang pagtilaw, isa ka tion agud pamatud-an ang aton mga kaugalingon nga takos sa pagbalik sa presensya sang aton Amay nga Langitnon. Agud kita matilawan, dapat kita magpangatubang sang mga hangkat kag mga kabudlayan. Ang mga ini sarang magguba sa aton kag ang aton mga kalag sarang madulaan sang paglaum kag magkalisud, ina, kon ang aton mga pundasyon sang pagtuo, ang aton mga panakshion sang kamatuoran wala nagtudok sing madalum sa aton mga kaugalingon.”¹

Tun-i ang mga Leksyon sang Nagliligad

“Sa aton pagtinguba para sa pinakamaayo naton nga mga kaugalingon, pila ka mga pamangkot ang magagabay sang aton panghunahuna: Ang akon bala

pagkatawo suno sa gusto ko? Mas malapit bala ako sa Manluluwas karon sangsa kahapon? Mangin mas malapit pa gid bala ako sa iya sa palaabuton? May kaisog bala ako sa pagbag-o para sa labing maayo? . . .

“Ang mga tinuig nag-abot kag nagligad, pero ang pagkinahanglan sang isa ka panakshion sa ebanghelyo nagapadayon nga tuman ka importante. Sa aton pagpadayon pakadto sa palaabuton, indi naton dapat pagbale-walaon ang mga leksyon sang nagliligad.”²

Ang Imo Personal nga Liahona

“Ang imo patriarchal blessing imo kag imo gid lang. Ayhan ini malip-ot ukon malaba, simple ukon madalom. Ang kalabaon kag lenggwahé indi importante sa isa ka patriarchal blessing. Ang Espiritu amo ang nagapabutyag sang matuod-tuod nga kahulugan.. Ang imo blessing indi dapat pagpil-on sing mahipid kag taguon. Indi ini dapat ipakwardro ukon ibantala. Sa baylo, dapat ini basahon. Dapat ini pakamahalon. Dapat ini sundon. Ang imo patriarchal blessing magabulig sa imo sa paglampawas sa pinakabudlay

nga pagtilaw. Magagiya ini sa imo sa paglampa was sa mga peligro sang kabuhi. . . . Ang imo patriarchal blessing isa ka personal nga Liahona para sa imo sa pagplano sang imo alagyan kag paggiya sang imo pagpanglakaton. . . .

“Ang pagpasensya ayhan kinahanglanon samtang kita nagabantay, nagahulat, kag naga-obra para sa ginpro-misa nga bugay nga matuman.”³

Magkari sa lya

“Dumduma nga wala ka nagalakat sing isahanon. . . . Sa imo pagpanglakaton sa kabuhi, maglakat pirme pakadto sa kasanag, kag ang mga landong sang kabuhi madula sa imo atubangan. . . .

“Sa akon [padayon ngal] pagdangop sa balaan nga mga kasulatan para sa inspirasyon, isa ka tinaga ang [padayon ngal] nagapangibabaw sa tagsa ka tion. Ang tinaga [amo ang] ‘kari.’ Ang Ginuo nagsiling, ‘Kari sa akon.’ Sia nagsiling, ‘Kari magtuon kamo sa akon.’ Sia nagsiling man, ‘Kari, magsunod sa akon.’ Luyag ko ina nga tinaga, *kari*. Ang akon pangamuyo amo nga mag-kari kita sa Ginuo.”⁴

MGA TANDA

1. “How Firm a Foundation,” *Liahona*, Nob. 2006, 62.
2. “Ang Pagtubo Pakadto sa Pinakamaayo Naton nga Kaugalingon,” *Liahona*, Abr. 2006, 3, 5.
3. “Your Patriarchal Blessing: A Liahona of Light,” *Ensign*, Nob. 1986, 66.
4. 16-stake fireside, Brigham Young University, Nob. 16, 1986.

PAGTUDLO GIKAN SA SINING MENSAHE

Ang *Teaching, No Greater Call* nagasiling: “Ang isa ka maayo nga manunudlo wala nagapamensar, . . . ‘Ano ang itudlo ko karon?’ kundi, ‘Paano ko buligan ang akon mga estudyante sa pagdiskubre kon ano ang kinahanglan nila mahibaloan?’” ([1999], 61). Agud buligan ang mga indibidwal nga makatuon gikan sa sinning artikulo, tilawi nga hatagan sila sang papel kag mga lapis kag hatagan sila sang tion agud mabasa ang mga pulong ni Pangulong Monson kag isulat ang mga kamatuoran nga ila nadiskubrehan parte sa espiritu-hanon nga pagkahanda. Ang mas magagmay nga kabataan sarang magdrowing sang mga larawan parte sa kon ano ang ila natun-an. Tilawi nga pangabayon sila nga ipaambit ang kon ano ang ila ginsulat ukon gindrowing.

LAMHARON

Ang Imo Patriarchal Blessing

Si Pangulong Monson nagalaragway sang isa ka patriarchal blessing bilang “isa ka personal nga Liahona sa pagplano sang imo alagyan kag paggiya sang imo pagpanglakaton.” Gani ano ini nga blessing, kag paano ini makabulig giya sa imo kabuhi?

Ano ang isa ka patriarchal blessing?

Ang imo blessing may duha ka mayor nga mga kautuyan. Una, ini magapahayag sang imo kaliwat, ukon kon sa diin nga tribo sang panimalay ni Israel ikaw nalakip. Ikaduha, ini magaunod sang mga impormasyon nga magabulig sa paggiya sa imo. Ang imo blessing ginapaabot nga magalakip sang mga promisa, mga laygay, kag mga paandam.

Pila dapat ang akon edad agud makabaton sang akon blessing?

Wala sang pat-od nga edad, pero dapat nagakai-go ang imo edad agud mahangpan ang sagrado nga kinaiya sang blessing. Madamo nga mga miyembro ang naga-sugod panumdum sa pagbaton sang ila blessing sa damlag nga babin sang ila pagkalamharon.

Paano ko mabaton ang blessing?

Una magpakigsugilanon sa imo bishop ukon branch president. Kon handa ka kag takos, magabaton ka sang isa ka recommend. Pagkatapos sina, sarang ka magpatigayon sang isa ka pat-od nga adlaw agud makigkita sa patriarch sa inyo lugar.

Ano ang himuong ko sa akon blessing?

Tagua ini sa isa ka luwas nga lugar, kag basaha ini sing masami. Panumduma, ang imo blessing sagrado kag personal. Puwede mo ini mapaaambit sa malapit nga mga miyembro sang pamilya, pero indi mo ini dapat pag-ibantala sa kadam-an. Dugang pa, ang tanan nga mga blessing nga namitlang sa imo patriarchal blessing nabase sa imo katutom kag sa panahon sang Ginuo.

KABATAAN

Isa ka Mabakod nga Pundasyon

Si Pangulong Thomas S. Monson nagsiling nga kinahanglan naton magpasad sang “isa ka mabakod nga

panaksihon sang kamatuoran." Isa sang pinakamaayo nga mga pamaagi sa paghimo sini amo ang pagbasa sang balaan nga mga kasulatan. Pangitaa ang mga bersikulo sa idalom. Magsulat sang isa ka butang nga natun-an mo sa tagsa ka bersikulo nga nagabulig sang imo panaksihon nga mas magbakod.

Mormon 7:5
Mga Artikulo sang Pagtuo 1:10
Moroni 10:5
D&C 11:12
Moroni 7:41
D&C 1:37
Mga Taga-Efeso 6:11

Husto nga Pagdumala sang Ikasarang kag Paglikaw sa Utang



*Itudlo ining balaan
nga mga kasulatan
kag sinambit nga
mga pulong ukon,
kon kinahanglanon, isa pa gid
ka prinsipyo nga magabugay sa
mga sister nga inyo ginabisita.
Magpanaksihon parte sa doktrina.
Agdaha yadtong inyo ginabisitahan
nga ipaambit ang ila nabatyagan
kag natun-an.*

Pagdumala sang Ikasarang

“Ang makinuton nga pagginawi’ . . . nagakahuligan sang [pagtipig] sang aton mga ikasarang, maayo nga pagplano sang mga butang nga may kaatangtanhan sa kwarta, lubos nga pagpanigana para sa personal nga ikaayong lawas, kag nagakaigo nga pagpanghanda para sa pagpatin-ad sang edukasyon kag karera, paghatag sang nagakabagay nga pagtamod sa pagpatubas kag pagtipon sang pagkaon sa puluy-an kag subong man sang pagpasanyog sang emosyonal nga kabakod. . . Kon maggawi kita sing husto kag makinuton, mangin luwas kita kasubong nga ara kita sa Iya mga palad.”¹

*Pangulong Spencer W. Kimball
(1895–1985).*

“Ano nga mga abilidad ang aton kinahanglanon agud

magbulig sa aton nga makasarang magsalig sa aton kaugalingon? . . . Sang bag-o pa lang ang Simbahang, si Brigham Young nagpangabay sa mga sister nga magtuon sa pagtapna sang balatian sa mga pamilya, magpasad sang mga kabuhian pangpuluy-an (home industries), kag magtuon sang accounting, bookkeeping kag iban pa nga praktikal nga mga abilidad. Inang mga prinsipyo nagakadapat pa gihapon sa karon. Ang edukasyon nagapadayon nga tuman ka importante. . . .

“Ginpamangkot ko ang pila ka mga bishop kon ano nga mga abilidad sa ikasarang sa pagsalig sa kaugalingon (self-reliance skills) ang pinakakinahanglanon sang mga sister sa mga ward, kag siling nila amo ang pagbadyet. Ang kababayin-an kinahanglan makahangop sang mga resulta sang pagpamalaklon nga ginautang kag indi paggawi sing nagakaigo sa badyet. Ang ika-duha nga abilidad nga ginlista sang mga bishop amo ang pagpangluto. Ang mga pagkaon nga ginhanda kag ginakaon sa puluy-an sa kabilugan mas barato, mas makapaayo sa lawas, kag nagabulig nga mas mapabakod ang mga relasyon sa pamilya.”²

Julie B. Beck, pangkabilugan nga pangulo sang Relief Society.

MGA BULIG PARA SA MGA VISITING TEACHER

Magkonsulta sa imo kaupod [sa visiting teaching] kon paano mahinalungan nga mapasibo ining mensahe sa sirkumstansya sang tagsa ka sister. Ano nga mga abilidad para sa ikasarang nga magsalig sa kaugalingon ang puwe-de ninyo mapaabit sa iya?

PERSONAL NGA PAGPANGHANDA

Malaquias 3:10

Mateo 6:19–21

Lucas 12:15

D&C 38:30; 88:119

Para sa dugang nga impormasyon, tan-awa sa *All Is Safely Gathered In: Family Finances* (item no. 04007).

Paglikaw sa Utang

“Luyag ko magpanugyan sang lima ka importante nga mga tikang pakadto sa pinansyal nga kahilwayan

“Una, magbayad sang inyo ika-pulo . . .

“Ika-duha, maggasto sing diutay sangsa inyo ginakita. . . .

“Ika-tatlo, magtuon sa pagsupot . . .

“Ika-apat, bayaran ang inyo mga utang kag iban pa nga pinansyal nga mga obligasyon . . .

“Ika-lima, tudloi ang inyo kabataan nga magsunod sa inyo ehemplö”³

*Elder Joseph B. Wirthlin (1917–2008)
sang korum sang Napulo'g Duha ka mga Apostoles.*

“Kon magpangutang kita, gina-panghatag naton ang kabahin sang aton malahalon, indi mabakal nga pagbuot (agency) kag ginabutang ang aton kaugalingon sa hungod nga pagpakaulipon. Ginahigot naton ang aton tinion, kusog, kag ikasrang sa pagbayad sang kon ano ang aton ginhulam—mga ikasrang nga sarang kuntani magamit sa pagbulig sa aton mga kaugalingon, aton mga pamilya, kag sa iban. . . .

“Agud mabayaran ang aton

kautangan karon kag malika-wan ang palaabuton nga utang nagakinahanglan nga kita mag-tuo sa Manluluwas—indi lang maghimo sing mas maayo kundi ang magmangin mas maayo. Ginakinahanglan ang dalayawon nga pagtuo sa pagmitlang sinang simple nga mga pulong, ‘Indi kita makasarang sini.’ Ginakinahanglan ang pagtuo agud magsalig nga ang kabuhi mangin mas maayo sa aton pagsakripisyo sang aton mga

luyag agud masabat ang aton kau-galingon nga mga panginahanglan kag ang iya sang iban.”⁴

Elder Robert D. Hales sang Korum sang Napulo’g Duha ka mga Apostoles.

MGA TANDA

1. “Welfare Services: The Gospel in Action,” *Ensign* Nob. 1977, 78.
2. “The Welfare Responsibilities of the Relief Society President,” *Basic Principles of Welfare and Self-Reliance* (2009), 5.
3. “Earthly Debts, Heavenly Debts,” *Liahona*, Mayo 2004, 41, 42.
4. “A Gospel Vision of Welfare: Faith in Action,” *Basic Principles of Welfare and Self-Reliance* (2009), 1.